

陝西通志

第十一冊

陝西通志

凡例

一秦省爲歷代都會地居上游西京之盛莫可殫述比來承流宣
化拱衛

神京休養生息百年於茲五府十州極豐亨樂利之象通志一書正
以鼓吹休明揚乾鴻業也使專尚簡貴則典章制度未免紀載
疎畧何以昭示不朽茲於上下古今蒐羅考訂分爲三十二類
列爲百卷未敢云取多用弘或不至因陋就簡

一陝志爲秦地紀載之書而於

朝廷六典制度靡不殫究吏之職官戶之貢賦鹽錢禮之學校祠
祀選舉兵之兵防驛遞工之城池關梁水利皆有關於政事者
也然非符檄考覈卷案徵信不敢濫登庶幾有裨於留心經濟

者爾

一事關制度典章爲直省通行遵奉者已經詳載

大清會典非秦志所宜專書如

訓飭士子文月吉講讀鄉飲賓興祀典樂章

表箋以及律例改定條款俱不敢載

一往古事迹尤爲居今所必稽但慮世遠言湮傳聞異同於是廣

搜四庫摭拾舊文務求徵信所有採錄原書每條登注尋覽者

因流溯源可以知所自矣

古書日就散佚或今本所無而昔賢所引如謝承後漢書晉陽秋之類尚

仍故名鄭注雖逸者亦稱水經注是也

一舊志成於康熙初年前撫臣賈漢復之手賈嘗撫豫再撫秦其

所撰兩省通志

朝議取爲他省程式但

家嘗奕葉重光之後深仁厚澤浹洽區宇其間政化多隨時隨地以爲因革損益在

會典已經再修今日之執簡而書者何敢從畧而馬谿田馮仲好舊志均有可取故補葺較多於刪削焉

一分類無義敘次無倫著述家所弗取此志原本史裁折衷諸說離爲三十二類首星野言地必本於言天也王者繼天出治度地居民必先分疆畫野故次之以建置建置定而疆域分於是封山濬川築城鑿池治事之廨宇立焉險阨之關梁設焉皆建置中所有事也立國以治民封建在先郡縣在後故封爵職官次之有土斯有財咸則三壤所以成賦厚生必正德敬敷五教所以明倫故貢賦學校次之事神以治陰求賢以治陽幽明之別也故祠祀選舉又次之安內以文德攘外以武功兵防其要

也置郵興屯皆武備所當修舉者也故兵防之後次以驛傳屯
運屯運以裕蓋藏溝洫以備旱潦水利者農政所資也一曰食
二曰貨鹽錢茶馬物產皆民生所以利用者也皇極之建必以
三德稽疑之明必驗於庶徵俯察五方之風氣仰觀五行之
休咎天人之際相爲感應者也故受之以風俗又受之以祥異
從來人存政舉都此土而主治者帝王蒞此土而佐治者牧伯
沐浴教化鍾毓靈秀產於此土之賢皆可傳述者也乃人亡事
往抔土依然世遠年湮遺踪宛在故帝系名宦人物之後又受
之以陵墓古蹟至於古今名山石室之藏人雖往而言不朽也
歷代治亂得失之林事雖遠而功可溯也故受之以經籍又受
之以紀事鴻文典冊仁政尤先德音所以昭

本朝之盛藝文所以揚歷代之休也其餘碎金雜俎諸類所不及

志者亦俱收並採雖稗野卮言在所不棄故受之以拾遺終焉

一 分類三十有二多師前人規格其中有附者取其相近

如形勝之於疆

域有合者取其相因

如關隘與津梁屯田與漕運

有併者取其相屬

如人物中包忠

節孝義流寓釋道方伎列女數種蓋彼亦人物中人無庸另為區別也

如經籍表作述之功紀事

垂古今之鑒德音宣

朝廷之德特為增類以備參攷

一 各類之中條件甚多叙次龐雜無由醒目故史志中自漢以下

咸析小目

如經籍則分經史子集禮儀則分吉凶軍賓嘉是也

今名宦人物藝文經籍選

舉風俗物產古蹟拾遺各以其所包者析之而仍標目於下以

便流覽

一 各類中有因時起例與通體微異者即於本類下注明或有考

究異同訂證舛錯闕疑傳疑之處俱於本條下加按字以別於

原書之本注

一龍門首闢史法創爲年表之例縱橫指畫事理包舉後有作者靡不效之茲於建置封爵亦倣其例庶幅幘廣袤世系相承上下數千載歷歷如在目前

一古地理書多爲圖經魏書直謂之地形志則可知畫沙聚米非繪事弗明也茲於各類若山川水利古蹟兵防驛遞作圖歸於本類而於建置疆域尤加詳焉蓋古來沿革不一不獨郡邑名稱屢更即城郭關河遠近疎密迥不相侔繪圖以補表之所不逮則前代一覽無餘再合以

本朝疆域尤瞭如指掌矣

一疆域繪圖限於尺幅不能詳備今照

皇輿圖首列通省總圖祇載府州縣及名山大川其次作五府十州

圖載山川關驛鎮營道路又次二州七十三縣各作一圖有城池泉渠祠宇橋渡古蹟陵墓鎮店舖遞分界悉列焉其地形之方員斜銳長短凹凸如其本形離之各成方幅界不踰域合之即成總圖間不容髮雖或山川阻深塗徑迂折而大槩已較然矣

一凡山川廨宇關梁祠廟河渠陵墓古蹟必以今州縣治為準而首揭其所在之方向里數然後援引故實發明訂正庶幾眉目朗如故雖有近代之書可徑列經史之前不嫌倒置又慮所引之書各代州郡建治不同於今因而方向里數與今迥別故又於建置中作列朝地圖考覽者從此互訂則牴牾適相符合矣一山川等類固當先標其所在之方向里數而有不可以方向里數計者如山則有巔有麓洞峪深入甚遠坡逕聯接則又甚近

是里數不可定也。川則有曲流，有環遶出山，或在西南流行，或在東北方向，亦不能定也。故考之志冊間，有不符。至於疆域之四至，八到，廣袤里數，更難畫一。蓋郡邑地形，百出，方圓欹銳，凹凸鈎環，加以高山深谷，四面八隅，不能咸備。而分界之處，多在通達之衢，未必適當其方位。且舊志所載道里有自治起者，有自城起者，有以隣界止者，有以隣治止者，參差不齊，故不獨里數不侔，而方向亦多錯出。不知營城邑設官守，當以治為準，分壤地，辨封疆，當以界為止。今疆域一類，先載治距所隸之里數，次載四正四隅分界里數。若以兩界各至治若干里合算，則隣邑至治之里數已寓於中矣。嘗見元和志式有至某界正東微南微北之說，甚爲得解。今所標者，雖不能作章亥履勘，而或治或界，偏左偏右，必折衷至確，乃敢登載其形，有不齊者，倣照元

和志式廢幾詳備云

一職官選舉題名舊志祇詳於明代今蒐輯羣書及金石刻各依官制科分增錄以備稽考其或有創設特遣之官官制所無及無科目可考者槩附一代之末

一舊例各類叙次多分府州但如人物一種古書紀載有泛稱秦人者既未便強屬何郡而古今地名沿革不一未必盡如今之分界又方伎隱逸釋道諸類中多有異域他省之人更難附屬是以按代編次而同時者則畧以地叙云

一名宦人物列傳採錄各史原文一字不敢妄增如原文內有地名在前人名居後或世系里居不詳於本傳而別見他傳者俱用小字旁注以別原文

一史家之體彰燿並行誌則隱惡揚善亦忠厚之意也然而好惡

之公不容偏廢使前愆炯鑒常懸心目未必不收懲創之益故於列傳用歐陽史例別爲雜傳以外之而拾遺中更標徵應鑒戒二目以寓儆惕之義焉

一秦中自周秦漢唐建國於此凡宮廷事宜俱關天下之大非專屬畿輔也故自周官周禮下至漢唐朝官不入職官名宦館庠遊學不入流寓禁軍不入兵制至若宮苑遺墟久成古蹟銀潢戚畹分封畿甸又不得泛視爲公家言而槩置弗錄也

一紀事一類仿照綱目編年大書巡狩會盟征伐諸大政以存統御之權餘分閏位莫不包舉然如彼此戰爭關乎疆宇則從其重者專載一朝之下

如蜀魏南北朝宋金元

若僭據秦土仍以正統爲斷

故自秦漢以降凡僭竊之制度

如莽之改官不入官制改邑不入沿革符秦石趙之臣不列

名不入名宦人物之類

不書其分統者不用此例

一歷代名篇佳什爭鳴藝苑美不勝收茲惟取其有關於斯土之政事文章人心風俗者嚴其程格以定去存至於投贈諛詞並當擯斥或所言止於一鄉一邑者亦自有州縣誌在茲弗槩及一藝文以有關通省及連數郡邑者始登其他可資各類考訂者則皆節採要語入各類中如遊覽入山川憑吊入古蹟陵墓營建入學校祠祀公署著作入經籍奏議入貢賦鹽錢兵防驛遞蓋典制重於翰墨也

一古人陳迹稗官紀載極繁凡有關於人情風土嗜好歌謠可以廣見聞資法戒者固爲採風所不廢至於畸行遺言談天說鬼原始要終歷代傳述爲茲土之故實亦必博採以助談叢其他侮慢鄙褻有妨風化者雖係斯土槩不濫登

御製德音官制錢穀兵屯建置有關典章者理宜尊崇

本朝而以歷代附考於後若祥異紀事人物藝文拾遺諸類則仍以古今世次順叙微有不同

一省志向例俱分郡邑但有界限劃然必應分者如城池關梁學校祠祀水利陵墓之類

有統屬聯貫必應合者如星野之言天文封爵之論世之職官選舉之題名兵防鹽法之制

度紀事德音祥異之編年帝系之紀傳經籍藝文之分類是也

有綴旒於冕宜先合而後分者如建置疆域貢賦屯運以省總冠前而以郡邑額分之

有若網繫網應分類而不分地者如物產入物風俗拾遺之類

有一經一緯分合兼用者如山川之名山大川各自繪圖撰考是也

各隨其宜不能強同

一誌宜詳密而省誌亦宜得體如里甲街市坊表之臚列下僚之題名掾史之額設存留之細數廨舍之間架渠堰之受水人物

中鄉曲之善士祠宇中羅列之姓名槩不濫收以侵郡縣志之

詳情也

一地誌以地爲經以代爲緯地所不屬則徑闕之如三國之吳六朝之陳與北齊宋時之遼諸類中槩不及之雖其時招集人民僑治他郡而襲故名者封爵建置悉爲辨正

一興漢二屬地接荆梁前代分隸他州郡星野兼入翼軫但所躔之度甚微微應自在全蜀全楚茲不具錄至古刺史郡守治不在境內而屬邑在境內如弘農武都者職官題名未敢槩登而於名宦則仍書之蓋當日勢分所臨既及其地而惠澤所流亦不可泯固善善欲長之義也

一陝甘昔合今分新設府州亦係舊時營堡故於疆域里數賦役額數皆不襲用舊說而以今冊爲準其職官中統轄之大僚如總督駐西安學政駐三原均入陝志提督駐固原入甘志至前

代之鹽學藩臬糧驛各道俱駐省城兼治全陝及但有叅政副使等銜而不能強分者悉入陝志

一漢有五原九原唐有安北都護宋有天德軍金元有豐雲二州咸入版章明世中衰棄河套地如甌脫延綏遂爲邊境我

朝聲教誕被屬國降王願爲保塞

祖宗撫綏荒服仍令駐牧套中今車書一統梯航所至罔不奉圖入告况近在塞垣之下乎凡套中山川城砦古蹟俱得附榆葭各州縣以類而見云

一陝省幅幘極廣如弘農跨陝豫之郊興元控雍梁之野以至綏葭昔爲趙地鳳興向屬武都其間山川人物舊志尚多混淆或因一時失檢分晰未清或因志在誇多獵取傳會遂至以訛襲訛遺誤後來今於河南湖廣山西四川甘省分界各州縣山川

必究其脈絡人物必詳其世系古蹟必核其時地合者收之
必舊志之所有不合者去之不必舊志之所無也

吏部尚書署理陝西總督印務併辦軍需事件臣劉於義戶部
尚書總理陝西巡撫並一切軍需事務臣史貽直陝西巡撫臣
碩色等恭承

勅旨纂脩陝西通志今已成書共一百卷謹奉

表上

進者臣於義等誠惶誠恐稽首頓首

上言伏以誕敷文命遂成禹貢之篇肇啟姬宗爰有職方之紀故
楚之良史能讀八索九丘魯有聞人頗采鄭書周語馬遷網羅
百代乃作八書班固囊括羣言初爲十志周官外史之掌四方
之志乘可稽漢家太史之藏列郡之計書咸在秘府雖有兩京
之記而山川風土尚略而不詳開元即有十道之圖而文物聲
明悉闕而不備蓋歷代之方輿雜錄大都多私撰之書而百家